

四庫全書

史部

欽定四庫全書

史部
元和郡縣志卷三十四

詳校官編修臣曹城

檢討臣德生覆勘

總校官庶吉士臣倉聖脉

校對官中書臣潘奕雋

謄錄監生臣胡澄

欽定四庫全書

元和郡縣志卷三十四

唐 李吉甫 撰

劔南道

三 唐書地理志劔南採訪使所管梓
州之前有霸州其縣曰安信牙利保寧歸

化有乾州其縣曰招武寧遠是志不載西川節度
使所管內而東川節度使所管亦無之又文獻通
考謂唐時渝州屬劔南道合州屬山南道舊唐書
則渝州亦屬山南是志渝合二州並屬東川節度
使而未詳何時自山
南改屬附識于此

梓州

梓潼下

開元戶一萬五千四百七十八 鄉二十六
元和戶六千九百八十五 鄉一十六

今為東川節度使理所

管梓州 劍州 綿州 遂州 渝州 合州 曹州 榮州 陵州 瀘

州 龍州 昌州 管縣六十九 都管戶三萬一千七百二十二

禹貢梁州之域秦并天下是為蜀郡漢高帝分置廣漢郡今州即廣漢郡郫廣漢二縣地也宋于此置新城郡梁武陵王蕭紀于郡置新州隋開皇末改為梓州因梓潼水以為名也州城宋元嘉中築左帶涪水右挾中江居水陸之衝要

州境

東西三百六十里
南北三百六十三里

八到

東北至上都取絳州路一千八百六十四里
東北至東都二千七百二十四里

正東微南至果州三百五十里
東南至遂州二百五十里

東北至閩州三百一十五里
正東微東州至普州三百五十里

西至漢州二百二十里
西南至簡州三百一十里

西北至絳州一百三十里
正北微東至劔州三百六十里

貢賦

開元貢
綾 絹
布 絳 絲 絲布

元和貢
綾十六尺
柑子
空青
曾青

管縣九

鄆 射洪 通泉 玄武 鹽亭 永泰

飛鳥 銅山 涪城

鄆縣 望鄆下

本漢舊縣屬廣漢郡因鄆江水為名也後魏置昌城郡改名昌城縣隋大業三年復為鄆縣

牛頭山一名華林山在縣西南二里四面危絕

涪江水經縣西去縣四里

縣有鹽井二十六所

射洪縣

上西北至州六十里

本漢郫縣地後周分置射洪縣縣有梓童水與涪江合流急如箭奔射涪江口蜀人謂水口曰洪因名射洪

白崖山在縣南十五里

涪江水西北自郫縣界流入在縣東一百步灘十七所

通泉縣

緊西北至州一百四十里

本漢廣漢縣地宋于此置西宕渠郡後魏恭帝移于涌

山改名涌泉郡周明帝置通井縣隋開皇三年改為通泉縣十八年改屬梓州

通泉山在縣南二里山前有石蝦蟆高七八尺

涪江水經縣東三里

沈水北自鹽亭縣界流入公孫述令延岑盛兵于沈水固守臧宮進兵縱擊大破之斬首溺死者萬餘人即此也

赤車鹽井在縣西北十二里又別有鹽井一十三所

玄武縣上東至州一百一十五里

本先主所立五城縣也屬廣漢郡後魏平蜀立玄武郡以縣屬焉隋開皇三年改五城為玄武縣因玄武山為名也屬益州武德三年割屬梓州

玄武山在縣東二里山出龍骨

天柱山一名覆船山在縣西南四十里

七里坂在縣東七里

內江水本名中江縣縣南去縣百步

鹽亭縣 上西南至州九十三里

本漢廣漢縣地梁于此置北宕渠郡及縣後魏恭帝改為鹽亭縣以近鹽井因名隋開皇三年罷郡屬梓州

梓潼水經縣南去縣三里

永泰縣 中西南至州一百四十五里

本漢巴郡充國縣地武德四年分置地號永泰因以為名

鹽亭溪水經縣北去縣一十九里

大汁鹽井在縣東四十二里又有小汁鹽井歌井針井

飛鳥縣

上東北至州一百四十五里

本漢鄆縣地隋開皇十三年于此置飛鳥鎮十年改鎮為縣因山為名

飛鳥山在縣西南五十五里

哥郎等八山並出銅鈔

鄆江水經縣北去縣四十里

銅山縣

中東北至州一百二十里

本鄆縣地有銅山漢文帝賜鄧通蜀銅山鑄錢此蓋其
餘峰也歷代採鑄貞觀二十三年置監署官前上元三
年廢監調露元年因廢監置銅山縣

飛鳥山在縣西南三十五里

鄆江水經縣南五里

涪城縣

緊東南至州六十里

本漢涪縣地隋開皇十六年改置涪城縣屬絳州大歷

十三年割屬梓州

劍州 普安上

開元戶一萬三千九百七十六
元和戶二千九百三

鄉二十五
鄉八十五

本漢廣漢郡之梓潼縣地武帝置十三州屬益州宋于此置南安郡梁武陵王蕭紀改郡立安州後魏廢帝二年先下安州始通巴蜀故改安州為始州隋大業三年罷始州為普安郡武德元年復為始州先天二年改為劍州取劍閣為名也

州境

東西二百六十七里
南北二百五十六里

八到

東北至上都一千四百三十里
東北至東都二千三百里

東南至閬州二百二十里

東北至利州一百九十里

西南至綿州二百九十里

西北至龍州三百二十里

貢賦

開元貢 蘇薰席
賦 綿 絹

元和貢 蘇薰席六領 已戟天 重臺

管縣八

普安 梓潼 黃安 永歸 陰平 武連

臨津 劍門

普安縣

中郭下

本漢梓潼縣地宋于此置南安縣周改為普安縣

大劍山亦曰梁山在縣北四十九里初姜維自沓中為
鄧艾所摧與張翼董厥合還保劍門以拒鍾會即此也
石新婦東北一里千人巖之南崖絕壁高數千丈即劍
山之危峰見數百里外旁視衆嶺猶平地也巖下高百
許丈有石壁紅色方如座席即孟陽勒銘之處

千人巖有石室可容千人因名

大劍水出縣西四十九里空冢山下

漢德政城又名黃蘆城在縣東北四十六里三面並阻絕澗惟西面少平周迴百五十步

鍾會故壘一名開遠戍在縣東北五十三里亦名空冢戍晉鍾會軍至此既度劍閣居此地遂掘冢決為死戰既無所埋故曰空冢後魏改名開遠戍

大劍鎮在縣東四十八里本姜維拒鍾會壘也在開遠戍東十一里其山峭壁千丈下瞰絕澗飛閣以通行旅

梁時于此置大劔戍

劔閣道自利州益昌縣界西南十里至大劔鎮合今驛道秦惠王使張儀司馬錯從石牛道伐蜀即此也後諸葛亮相蜀又鑿石駕空為飛梁閣道以通行路初李特入漢川至劔閣顧盼曰劉禪有如此地面而縛于人豈非庸才

石新婦神在縣東北四十九里大劔東北三十里夫遠征婦極望忘歸因化為石

梓潼縣

上東北至州一百六十里

本漢舊縣屬漢郡蜀先主分廣漢置梓潼潼郡以縣屬焉隋開皇三年罷郡以縣屬始州後改屬劍州

梓潼水一名馳水北自陰平縣界流入

鄧艾祠在縣南百步

黃安縣

屯下北至州一百四十里

本漢梓潼縣地宋于此置華陽縣屬南安郡後魏禪帝改為南安縣周武帝改為黃安縣

永歸縣

中下西北至州五十三里

本漢梓潼縣地宋于此置白水縣周閔帝改為永歸縣

陰平縣

中東至州一百四十里

本漢梓潼縣地宋明帝泰始中于此置北陰平郡并縣
隋開皇三年罷郡以縣屬始州皇朝初因之後改入劍

州

龍血山一曰龍象巖在縣北五十里絕壁高巖萬有餘
丈有四石龍在石壁間昔者羣龍共鬪四龍疲血嘔血

死因化為石血變成鼈堪充器物但不耐風日繇布四
五里土人取之今龍象猶存石不復入用

岐江水下流即梓潼水也東流縣西南五里

武連縣

中東北至州八十五里

本漢梓潼縣地宋元嘉中于縣南五里僑立武都郡下
辨縣又改下辨僑置武功縣周明帝改武功為武連縣
隋開皇三年罷郡以縣屬始州

臨津縣

中下西北至州一百三里

本漢梓潼縣地南齊于此置胡原縣地開皇七年改為
臨津縣

掌夫山在縣西南六十里晉太安元年遣都護衛博討
李特特遣將李盪自掌夫山要博博為伏兵所圍即此
山山出名柘堪為弓材雖屢桑燕角不能勝也

劍門縣

中西南至州六十里

本漢葭萌縣地聖歷二年分普安永歸陰平三縣置劍
門縣因劍門為名也

梁山在縣西南二十四里即劔門山也

緜州 巴西

開元戶五萬一千四百八十
元和戶七千一百四十八
鄉一百十三
鄉九十三

本漢廣漢郡之涪縣後魏廢帝二年徙梓潼郡理梓潼

舊城于此別置潼州

梓潼舊城在
今劔州界

隋開皇五年改潼州

為緜州因緜水為名也大業三年改為金山郡武德元
年復為緜州按州理城漢涪縣也去成都三百五十里
依山作固東據天池西臨涪水形如北斗卧龍伏馬為

蜀東北之要衝梁天監中張齊為太守更造樓櫓卻敵
有東西門東門久塞富樂山氣所衝門開則喪亂宋元
嘉初太守王懷業開之果致覆敗爾後還塞

州境

東西三百一里
南北二百六十里

八到

東北至上都一千七百三十四里
東北至東都二千五百九十四里

東南至梓州一百三十里
西南至漢州一百八十里

西至茂州取松嶺路三百七十里
北至龍州二百二十里

貢賦

開元貢 對鳳兩窠獨窠白紬 雙劍二十疋
賦 絛 絹

管縣八

巴西 昌明 羅江 神泉 龍安 魏城

鹽泉 西昌

巴西縣 望郭下

本漢涪縣地屬廣漢郡先主定蜀立梓潼縣以縣屬焉
晉孝武帝徙梓潼郡于此後魏改為巴中縣隋開皇元
年避廟諱改為巴西縣

富樂山在縣東五里

天池山在縣北一十餘里

涪江水經縣西去縣五十步

羅江水經縣西去縣三十五里

蔣琬墓在縣西八里琬為大司馬任漢中後上疏曰今涪水陸四通惟急是應若東北有虞赴之不難由是琬還任涪疾轉增劇卒于此而葬焉

譙周墓在縣南十六里周將亡戒諸子曰吾後嗣當有黃頭黑齒幾亡吾族及周孫縱之生也頭黃齒黑晉末

刺史毛璩使縱領白徒七百人由涪水下討桓玄西人不樂遠征乃逼縱為主攻陷巴西遂屠益州既害毛璩自號成都王義熙九年朱齡石討平之卒如周言

昌明縣

緊南至州七十里

本漢涪縣地晉孝武帝自白沙戍移漢昌縣僑理于此仍屬巴西郡後魏廢帝改漢昌為昌隆縣先天元年改為昌明縣

涪水經縣南去縣一里

羅江縣

中

廉水經縣東北讓水出縣北平地宋明帝時梓潼涪人

范百年因論事之次帝語及廣州貪泉百年對曰臣家

梁益所居廉讓之間即此水也

案此條前缺羅江縣建置原委據舊唐書羅江

漢涪縣地晉于梓潼水尾萬安故城置萬安縣後魏置萬安郡隋廢天寶元年改萬安為羅江廉泉讓水出縣

北平地也又新唐書云縣北五里有茫江堰引射水溉田北十四里有楊村堰引折脚堰水溉田此皆缺載

神泉縣

上東北至州八十四里

本漢涪縣地晉孝武帝于此僑置西充國縣屬巴西郡

隋開皇三年罷郡縣屬潼州六年改為神泉縣因縣西

神泉為名

神泉在縣西平地冬夏溫沸氣如附子能愈衆疾

龍安縣

上東北至州七十八里

本漢涪縣地周武帝天和六年于此置金山縣隋大業

三年廢武德三年于廢金山縣城置龍安縣因山為名

金山在縣東五十步每夏雨奔注崩頽之所則金粟散

出大者如碁子

龍安山在縣北十里有好林泉隋開皇中蜀王楊秀立亭館以避暑

魏城縣

上西南至州六十五里

本漢涪縣地隋大業十年自鹽泉井移魏城縣理此屬金山郡按鹽泉井在今縣東南四十五里鹽泉縣理是也

高靈山在縣北二十四里

東西井在縣東南四里井西為涪縣界井東為梓潼縣

界二縣界分境之所故曰東西

鹽泉縣

中下西至州五十六里

本漢涪縣地後魏禪帝元年割涪縣置魏城縣武德三年分魏城置鹽泉縣

五層山在縣西南三十里

梓潼水經縣北去縣十八里

陽下鹽井在縣西一里

西昌縣

中東至州五十六里

本漢涪縣地晉孝武帝于此置置益昌縣隋開皇三年
省永淳元年又置以與利州益昌縣同名以其在州西
因改為西昌縣

龍臺山在縣東北四里

龍安水在縣北五里

遂州 遂寧中府

開元戶三萬七千三百七十七 鄉六十五
元和戶三千八百四十六 鄉六十五

禹貢梁州之域秦為蜀郡地漢分置廣漢郡今州又為

廣漢郡之廣漢縣地後分廣漢為德陽縣東晉分置遂寧郡周保定二年立為遂州後因之

州境

東西一百二十里
南北一百九十里

八到

東北至上都取果州路二千二十里
東北至東都二千八百八十里

東至合州二百六十里
東北至果州一百七十里

正南微西至普州一百四十里
西北至梓州二百五十里

貢賦

開元貢 樗蒲綾一十五疋
元和貢 天門冬 柑子

管縣五

方義 長江 青石 蓬溪 遂寧

方義縣

望郭下

本晉小溪縣也穆帝永和十一年置屬遂寧郡後魏恭帝改為方義縣隋開皇三年罷郡縣屬遂州

涪江水北去縣八十步

縣四面各有鹽井凡一十二所

靈星池在縣西南四里

龍池在縣北百二十步

長江縣

上南至州五十里

本晉巴興縣魏恭帝改為長江縣

涪江經縣南去縣二百五十步

青石縣

中西北至州七十里

本晉之晉興縣也本屬巴郡既置遂寧乃割屬焉後魏改為始興縣隋開皇十八年改為青石縣

青石山在縣東南水路五十九里舊巴蜀爭界累年未分一朝密霧石為之裂破從上至下直若引繩因此定

遂合二州之界

涪水經縣南去縣一里

九節溪出縣東三十六里灘有九節因為名

蓬溪縣

中西南至州一百二十里

永淳元年割方義縣北界于今縣南二十里蓬川置唐興縣長壽二年改為武豐神龍元年復為唐興天寶元年改為蓬溪

石香爐山在縣西五里

縣有鹽井一十三所

遂寧縣

中東南至州一百二十里

景龍二年割青石縣置

渝州

南平下

開元戶五千九百六十二

鄉十七

元和戶八百三十二

鄉一十

禹貢梁州之域古之巴國也閬白二水東南流曲折如巴字故謂之巴然則巴國因水為名武王伐殷巴人助焉其人勇銳歌舞以凌殷郊後封為巴子其地東至魚

復西抵夔道北接漢中南極牂柯是其界也春秋時亦為巴國戰國時楚既稱王巴亦稱王秦惠文王使張儀司馬錯伐巴蜀滅之分其地為三十一縣始皇置三十六郡巴即一焉漢高帝既定三秦項羽背約封為漢王王巴蜀天下既定乃分巴蜀置廣漢郡武帝又置犍為郡劉璋為益州牧于是分巴郡自墊江以下為永寧郡先主又以固陵為巴東郡由是巴郡分而為三號曰三巴梁武陵王蕭紀于巴郡置楚州後魏改為巴州周閔

帝又改為楚州隋開皇九年改楚州為渝州因渝水為名漢高祖還伐秦巴人從軍歌舞陷陣帝善之曰此武王伐紂之歌也後令習之所謂巴渝舞也

州境

東西五百一十六里
南北四百七十九里

八到

東北至上都二千八百一十里
東北至東都三千六百七十里

東北至涪州水路三百四十里
西南至瀘州水路七百里

西北至合州一百六十里
西至渠州四百四十里

江津縣在州西一百二十里縣南陸路至秦州三百六十里又自江津縣南循夔溪水路至南州二

百三十里

貢賦

開元貢
元和貢

葛五疋
葛

牡丹皮
藥子

管縣五

巴

江津

萬壽

南平

壁山

巴縣

中下郭下

本漢江州縣也屬巴郡在岷江之西漢水之南即蜀將
李嚴所修古巴城也南齊改為墊江縣周明帝武三
成
年改為巴縣後遂不改

州理城即漢巴郡城也先主令都督李嚴鎮此又鑿南山欲會文涪二水使城在孤洲上會嚴被徵不卒其事鑿處猶存

江津縣

中下東至州一百二十里

本漢江州縣地屬巴郡周改為江陽縣隋開皇三年改為江津縣屬渝州

萬壽縣

中下東北至州三百八十里

本漢江州縣地武德三年分江津置萬春縣屬渝州五

年改為萬壽縣

綾縣山在縣西八十五里

大江水經縣南去縣二里

南平縣 中下西至州一百三十里

本漢江州縣地貞觀四年分巴縣置南平縣屬南平州
十三年廢州縣改屬渝州

瀛山在縣西南三百七十里以其高峻象海中蓬瀛故

名

巴子魚池在縣西北一十里

壁山縣

中下東北至州一百八十里

本漢江津萬壽巴三縣地四面高山中央平田周迴約
二百里天寶中諸州逃戶多投此營種川中有一孤山
西北二面險峻東南面稍平土人號為重壁山至德二
年置縣因山為名縣東陸路至江津縣二百三十里

台州

巴川中

開元戶二萬六十七
元和戶二千八百九十二

鄉四十二
鄉三十九

禹貢梁州之域春秋時為巴國秦滅之以為巴郡今州
即漢巴郡之墊江縣地也宋文帝元嘉中于此置東宕
渠郡後魏恭帝于東宕渠郡改置合州以涪江自梓遂
州來至州南與嘉陵江合流因名合州

州境

東西三百二十四里
南北六百三十九里

八到

東北至上都二千六百五十里
東北至東都三千五百一十里

西至遂州陸路二百六十里水路三百七十里
西南至瀘州五百九十里

北至果州三百里

貢賦

開元貢藥子一百顆牡丹皮十斤桃竹筍
案此與前遂渝二州後榮龍二州之賦並傳寫缺

管縣六

石鏡 漢初 新明 銅梁 巴川 赤水

石鏡縣

上郭下

本漢墊江縣屬巴郡後漢岑彭與臧宮伐公孫述自江
州從涪水上至墊江是也宋文帝于此置東宕渠郡石
似鏡因以為名

銅梁山在縣南九里蜀都賦曰外負銅梁石渠是也山

出鐵及桃枝竹

涪江水經縣南去縣二百步

巴子城在縣南五里

漢初縣

中東南至州一百九十四里

本漢墊江縣地後魏于此置漢初縣屬合州

西溪水一名嘉陵水經縣理南去縣一里

新明縣

中西南至州一百二十里

本漢墊江縣地自後魏訖隋又為石鏡縣地武德二年

分石鏡縣之東北界為新明縣

銅梁縣

中東至州二百五十里

長安四年刺史陳靖意以大足川僑戶輻湊置縣取小銅梁山為名

小銅梁山在縣西北七十里

涪江水在縣東北四十里

巴川縣

中北至州二百里

開元二十三年刺史孫希莊奏割石鏡之南銅梁之東

置縣

小安南溪源出縣南山下

赤水縣 中東至州一百里

本漢墊江縣地隋開皇八年分石鏡縣于今縣西二里

置縣因水為名

朝霞山在縣南十八里

普州 安岳中

開元戶三萬二千六百八
元和戶一千六百五十二
案鄉數傳寫缺
鄉二十五

禹貢梁州之域秦漢為巴蜀二郡之地今州即漢之資

中牛鞞

音鞞

墊江後漢之德陽四縣之地周武帝于縣立

普州隋大業二年罷普州以所領縣屬資州武德二年

重置

州境

東西二百七十八里
南北一百九十三里

八到

東北至上都二千一百六十里
東北至東都三千二十里

正南微西至資州一百七十里
正西微北至簡州二百四十里

正北微東至遂州一百三十里
正北微西至梓州二百五十里

貢賦

開元貢賦

葛八尺

紵布絹

元和貢

天門冬

管縣六

安岳 普康 安居 普慈 崇龕 樂至

安岳縣

上郭下

周武帝建德四年與州同置

縣有鹽井一十所

安岳山在縣西南一里

普康縣

下北至州七十里

周建德四年于此置永康縣隋開皇十八年改為隆康
先天元年改為普康

縣有鹽井三所

安居縣

中南至州八十里

本周柔剛縣也因山為名隋開皇十二年改為安居縣
因水為名天授三年移于今理

柔剛山在縣東二十里

安居水在縣北八十步

縣有鹽井四所

普慈縣

中東南至州一百里

本名多業縣周建德四年置屬普慈郡隋開皇十三年
改多業為普慈

娑娑山在縣西北三十里其山絛亘數百里

安居水在縣北一里

縣有鹽井一十四所

崇龕縣

下西至州一百一十里

隋開皇三年于此置隆龕鎮大業十二年于鎮置縣先天元年改為崇龕山為名

崇龕山在縣西三里

樂至縣

中東至州一百四十里

本周車免鎮也屬普州以車免山為名武德三年于鎮

置樂至縣

樂至池在縣東二里

榮州 和義下

開元戶四千七百七
元和戶八百八十

鄉一十五
鄉二十

禹貢梁州之域秦為蜀郡地在漢即犍為郡之南安縣地也李雄據蜀後夷獠居之所謂鐵山生獠也隋開皇十三年置大牢縣武德元年割資州大牢威遠二縣于公井鎮置榮州取榮德山為名也

州境

東西一百八十三里
南北一百三十六里

八到

東北至上郡取資州路二十四百九十里
東北至東郡取資州路三百五十里

東北至資州一百六十里
東北至瀘州水陸路相兼五百四十里

南至戎州三百一十里
西至嘉州二百一十里

西北至陵州二百一十里

貢賦 開元貢 斑布六疋 利鐵

管縣六

旭川 谷官 和義 威遠 公井 應靈

旭川縣 中下郭下

本漢南安縣地貞觀元年于此置旭川縣因縣有鹽井

號旭井取以名縣

榮德山在縣東北三十五里

鐵山在縣北四十里

大牢溪出縣北鐵山下南流經縣北

洛官縣 中下東南至州九十里

本漢南安縣地晉義熙十年置冶官縣屬犍為郡隋後
誤以冶為洛也武德元年屬嘉州貞觀六年改屬榮州
白崖山在縣西北十里

和義縣

中下西南至州一百七十里

本漢資中縣地是資瀘二州界隋大業十二年分置和義縣以招和夷獠故以和義為名

內江水在縣西一百七十里

縣有鹽井五所

威遠縣

中下西至州七十里

本漢資中縣地隋開皇三年于此置威遠縣以招撫生獠十一年改戍為縣屬資州武德元年改屬榮州

鐵山在縣西北四十里

威遠鎮在縣城內

縣有鹽井七所

公井縣 中下西北至州九十里

本漢江陽縣地屬犍為郡周武帝于此置公井鎮隋因之武德元年于鎮置榮州因改鎮為公井縣

野客山在縣南六十里

縣有鹽井十所又有大公井故縣鎮因取為名

應靈縣

中下東北至州一百五十里

本漢南安縣地隋開皇十年于此置大牢鎮十三年改鎮為縣縣界有大牢溪因取為名天寶元年改為應靈縣有鹽井四所

陵州

仁壽中

開元戶一萬七千九百五十五
元和戶一千九百八十五

鄉四十七
鄉四十七

禹貢梁州之域秦為蜀郡地在漢即犍為郡之武陽縣之東境也晉孝武帝太元中益州刺史毛璩益西城戍

以防鹽井周閔帝元年又于此置陵州因陵井以為名
陵井者本沛國張道陵所開故以陵為號晉太元中刺
史毛璩乃于東西兩山築城置主將防衛之後廢陵井
更開狼毒井今之煮井是也居人仍舊名猶曰陵井其
實非也今按州城內北二面懸崖斗絕四面顯敞南臨
井

州境

東西一百四十里
南北三百一十里

八到

東北至上都二千二百一十里
東北至東都三千七十里

東至資州二百三十五里

東南至榮州三百一十里

東北至成都二百里

東北至簡州一百八十里

西至眉州七十里

西至嘉州一百九十里

貢賦

開元貢

楚金

細葛四疋

賦

絹絲

管縣五

仁壽 貴平 籍 始建 井研

仁壽縣

本漢武陽縣之東境也後魏定蜀于此置普寧縣屬懷

仁郡隋開皇三年罷郡以縣屬陵州十八年改普寧為
仁壽縣

三隅山有東隅南隅西隅三山相對去陵井各一里故

為名

婆支水出縣北婆支山去縣四十五里

陵井縱廣三十丈深八十餘丈益部鹽井甚多此井最
大以大牛皮囊盛水引出之役作甚苦以刑徒充役中
有祠益井神

張道陵祠在縣西南百步陵開鑿鹽井人得其利故為立祠陵即張魯之祖父學道鶴鳴山人從受道者出五斗米故時人號米賊亦曰五斗米道

貴平縣

中西南至州六十七里

本漢廣都縣之東南地後魏于此置和仁郡仍立縣
唱車山在縣西南九里

祿水在縣南五十步

平井鹽井在縣東南七步

籍縣

上東南至州一百里

本漢武陽縣地周閔帝于此置籍縣因蜀先王籍田地為名隋大業二年省永徽四年復置

丹砂田在縣南七十里

大江水在縣北三十五里

木津水在縣南五里

始建縣

中下北至州五十七里

本漢武陽縣地隋開皇十年于今縣立始建鎮大業五

年改鎮為縣聖歷二年移于仁壽縣界置其舊縣復置
始建鎮

鐵山在縣東南七十里出鐵諸葛亮取為兵器其鐵剛
利堪充貢焉

井研縣 中北至州一百一十五里

本漢武陽縣地隋大業元年因井研鎮立縣取鎮為名
屬陵州

井研鹽井在縣南七里鎮及縣皆取名焉又有四稜井

鑊井

瀘州

瀘川下府

開元戶一萬六千八百七
元和戶一千九百六十九

鄉三十七
鄉三十八

禹貢梁州之域春秋戰國時為巴子國秦并天下為巴郡地武帝分置犍為郡今州即犍為郡之江陽符二縣之地按江陽即今州城是也先主入益州遣諸葛亮張飛等引兵泝流定江陽是也晉穆帝遣安西將軍桓溫將萬人伐李子仁軍次江陽亦謂此地也後為獠所沒

梁大通初割江陽郡置瀘川魏置瀘州取瀘水為名隋大業三年改為瀘川郡武德元年復為瀘州

州境

東西四百七十八里
南北五百六十三里

八到

西北至上都取資州路三千三百三十里
東北至東都三千八百三十里

東北至渝州水路七百里

東北至合州五百九十里

西北至榮州五百四十里

西北至資州泝流六百三十里

西至戎州水路三百一十里陸路二百四十里山路險峻或不通

貢賦

開元貢

麩金 葛 醬
麻 布

管縣五

瀘川 緜水 江安 富義 合江

瀘川縣

中下郭下

本漢江陽縣也屬犍為郡初曹公入漢中諸葛亮出屯江陽晉穆帝于縣置東江陽郡領江陽縣隋開皇三年罷郡以縣屬瀘州大業元年改江陽縣為瀘川縣皇朝因之

汶江水經縣南三十步

中江水亦曰緜水經縣北三里出楚金

緜水縣

中下東至州一百六十里

本漢江陽縣地晉于此置緜水縣

汶江水經縣東一十五里

江安縣

中下東北至州五十里

本漢江陽縣地也李雄亂後沒于夷獠晉穆帝于此置漢安縣十八年改為江安縣

方山在縣西北一十二里

汶江水經縣北八十步

可盛鹽井在縣西北一十一里

富義縣

中下東南至州三百里

本漢江陽縣地周武帝于此置富世縣貞觀二十三年
改為富義縣

中江水亦曰緜水經縣東百步

富義鹽井在縣西南五十步月出鹽三千六百六十石
劍南鹽井惟此最大其餘亦有井七所

合江縣

中下西至州一百二十里

本漢符縣地晉穆帝于此置安樂縣梁改置安樂戍周改為合江縣

安樂山在縣東八十三里縣取名焉

龍州

江油下都督府

開元戶九百一十九
元和戶三百二十九

鄉六
鄉六

禹貢梁州之域秦漢及魏不置郡縣魏景元元年詔鄧艾征蜀艾自陰平行無人之地七百餘里鑿山通道造作橋閣

山高谷深至為艱險艾自氈自裹推轉而下將士皆攀木
緣崖魚貫而進先登至江油即其地也晉于此置平武縣
屬陰平郡至梁有楊李二姓最豪分據其地各稱藩于梁
至西魏禪帝二年平蜀于此立龍州隨末陷賊武德元年
隴蜀平定改為龍門郡其年加西字貞觀元年改為龍州

州境

東西四百六十八里
南北至東九十六里

八到

東北上都取利州路一千六百五十里
東北至東都二千五百一十里

東至利州四百里
東至松州三百二十里

東南至劍州三百二十里

西至緜州二百二十里

西南至茂州四百九十里

西北至扶州六百里

北至渝州取文州路三百三十里

貢賦

開元貢

麩金

羚羊角

烏頭

附子

天雄

側子

管縣二

江油 清川

油縣

中下郭下

本晉平武縣地後魏于此置江油郡并立江油縣以屬焉

石門山在縣東一百三里有石門戍與氏分界去仇池城四百餘里

雪山在縣西三百里以春夏常有積雪也

饗崖山在縣南八十二里出錫

涪江南流經州城東又經江油城東其水出金

清川縣 中下西南至州九十里

本後魏之馬盤郡也領馬盤一縣屬龍州隋開皇三年罷郡縣入郡理屬龍州天寶元年改為清川縣

昌州

昌元中

元和戶一千一百九

鄉七

案此州置自乾元故不載開元戶鄉與貢賦

本漢資中縣之東境墊江縣之西境江陽郡之北境皇朝乾元元年左拾遺李鼎祚奏以山川闊遠請割瀘普渝合資榮等六州界置昌州尋為狂賊張朝等所焚州遂罷廢大曆十年本道使崔寧又奏復置以鎮押夷獠其城南憑赤水北倚長崑極為險固

州境

案州境里數傳寫缺

八到

北至上都取普州遂州路二千五百四十里
東北至東都三千四百里

東北至合州三百九十里

正南至瀘州取合江縣路三百八十里

西北至資州三百里

正北微西至普州三百八十里

貢賦

元和貢筒布
系元和賦傳寫缺

管縣四

靜南 昌元 永川 大足

靜南縣

中郭下

乾元元年與州同置

欽定四庫全書

元和郡縣志

二十七

銅鼓山在縣北八十里

赤水溪經縣南去縣九十步

始龍溪在縣東南流屈曲五十里合赤水溪流也

昌元縣 中東至州一百二十里

乾元元年與州同置東接瀨波溪西臨耶水

葛仙山在縣南一百五十里

瀨波溪在縣南五十步

永川縣 下西至州九十里

大厯十一年置東西北三面並枕侯溪水南面接延陵
英山

大鐵山在縣東南八十里

大足縣

下西南至州七十五里

乾元元年與州同置東臨赤水西枕榮山

牛鬪山在縣東南八十里

元和郡縣志卷三十四

欽定四庫全書

元和郡縣志卷三十五

唐 李吉甫 撰

嶺南道 一

廣州 南海中都督府

開元戶六萬四千二百五十 鄉一百九十四
元和戶七萬四千九十九 鄉九十一

今為嶺南節度使理所 管廣州循州潮州端州康
州封州韶州春州新州雷

州羅州高州恩州潘州辯州瀧州勤州崖州瓊州
振州儋州萬安州 案管縣及都管戶數傳寫缺

所列州目與唐書方鎮表元和時嶺南節度使領
二十二州相合今缺春新以下十五州志文春州
即南陵郡其縣曰陽春羅水新州即新昌郡其縣
曰新興索盧永順雷州即海康郡其縣曰海康遂
溪徐聞羅州即招義郡其縣曰廉江吳川幹水零
絳高州即高涼郡其縣曰良德電白保定恩州即
恩平郡其縣曰恩平杜陵陽江潘州即南潘郡其
縣曰茂名潘水南巴辯州即陵水郡其縣曰石龍
陵羅瀧州即開陽郡其縣曰瀧水開陽鎮南建水
勤州即雲浮郡其縣曰銅陵富林崖州即珠崖郡
其縣曰舍城澄邁文昌瓊州即瓊山郡其縣曰瓊
山臨高曾口樂會顏羅振州即延德郡其縣曰寧
遠延德吉陽臨川落屯儋州即昌化郡其縣曰義
倫昌化感恩洛場富羅萬安州即萬全郡其縣曰
萬安陵水富雲博遠此元和時十五州所領五十
縣可徵諸地理志合封韶以上七州所領縣為八

十有
六也

禹貢梁州之域春秋時百越之地秦并天下置南海郡

下言南海郡地
即禹貢之域也

秦末趙佗竊據之高帝定天下為中國

勞苦釋佗不誅因立佗為南越王使無為南邊害至武

帝元鼎五年遣伏波將軍路博德出桂陽下湟水樓船

將軍楊僕下涪水咸會番禺誅佗玄孫建德及相呂嘉

遂定越地以為南海蒼梧鬱林交趾九真日南珠崖儋

耳郡按漢南海郡即秦南海故郡也屬交趾刺史獻帝

末孫權以步騭為交州刺史遷州于番禺即今州理是也孫皓時以交州土壤太遠乃分置廣州理番禺交州徙理龍編晉代因而不改義熙中盧循自稱平南將軍廣州刺史用徐道覆計舉兵建業軍敗單舸走保廣州為晉將杜慧度所破投水而死隋開皇九年平陳于廣州置總管府仁壽元年改廣州為番州大業三年罷番州為南海郡隋末陷賊武德四年討平蕭銑復為廣州開元二十一年又于邊境置節度經略使式遏四夷廣

州為嶺南五府經略使理所以綏靜夷獠統經略軍

南海

郡係本州城內有經略軍額管鎮兵五千四百人

清海軍

恩平郡管兵一千人恩平今恩州

桂

管經略使

始安郡管兵千人

容管經略使

普寧郡管兵一千一百人

鎮南經

略使

安南都護府管兵四千二百人

邕管經略使

朗寧郡管兵一千七百人

州境

東西南北一千二百一十里

八到

西北至上都取郴州路四千二百一十里取虔州大庾嶺路五千二百一十里

西北至東都取桂州路五千八十五里東北至韶州五百三十里

正南至大海七十里正西微北至端州沿沂相兼二百四十里

西南至恩州水路六百里
西北至賀州八百七十六里

貢賦

開元貢

沈香
竹布

甲香
絲布

鍾乳
蕉布

石斛
蚺蛇膽

山薑

元和貢

荔枝煎

餘甘子

占臘香

鼈皮

案唐六典嶺南道厥賦蕉紵落麻今是志以蕉布
絲布麻布為廣州及潮端康封韶等州之貢當因
傳寫脫去賦字誤移作貢非李吉甫之原本也

管縣十三

南海

番禺

化蒙

懷集

增城

泮水

東莞

新會

義寧

清遠

四會

浚陽

滄淮

南海縣 上郭下

本漢番禺縣之地也屬南海郡隋開皇十年以其地置

南海縣屬廣州

番山在縣東南三里

禺山在縣西南一里尉佗葬于此

南海在縣南水路百里自州東八十里有村號曰古斗
自此出海浩淼無際

石門水一名貪泉出縣西三十里平地即晉廣州刺史

吳隱之飲水賦詩之處

州城步隲所築也隲為交州刺史登臺遠望乃曰斯誠

海島膏腴之地

案斯誠各本作新城非未築時語步隲本傳不載其事詳見水經注今據以改

正

宜為都邑遂遷州于番禺建築城郭焉

趙佗故城在縣西二十七里即尉佗都城也

陸賈故城在縣西一十四里賈之來也佗不即前賈故

為城以待之

盧循故城在縣南六里循既為宋高祖所破聚其餘黨

還至番禺高祖遣建威將軍孫季高振武將軍沈田子力戰大破之

朝臺在縣東北二十里

桑水經注引交州治中姚丈式問答云朝臺在州城東北三十

里昔尉佗初遇陸賈之處也後歲時于此望漢朝拜故曰朝臺

牛鼻鎮在縣西北五十里

赤岸戍在縣東百里

柴石戍在縣東七十里

北廟在縣北三里即尉佗之廟也

虞翻廟在縣西北三里翻為孫權騎都尉以數諫爭徙

交州卒

海廟在縣東八十一里

任囂墓在縣北三里

尉佗墓在縣東北八里又言佗葬在禺山蓋與此相連
接耳

番禺縣

工北至州十五里

本秦舊縣故城在今縣西南二里縣有番禺二山因以
為名或言置在番山之隅隋開皇十年改置南海縣即
今縣是也長安三年于江南洲上別置番禺縣取漢名
其洲周迴約八十里

化蒙縣

下東南至州四百八十里

本秦四會縣之地宋元嘉十三年分四會縣之蒙鄉置
化蒙縣屬綏建郡隋開皇十年廢郡以縣屬廣州
鉛穴山在縣西六十里出鉛錫

滑水一名綏建江經縣南去縣三十步

懷集縣

中東南至州六百三十里

本漢四會縣地也宋元嘉中分四會縣之銀屯鄉置懷

集縣屬綏建郡隋開皇十年改屬涇州

涇州即今廣州
滄涇縣理是也

二十年廢涇州改屬廣州

驃山在縣東北四十二里多鐵鉞百姓資焉

綏建江經縣西南二里

增城縣

中西南至州一百八十里

本漢番禺縣地後漢于此置增城縣按崑崙山上有閩
風增城蓋取美名也屬南海郡隋開皇十年屬廣州

猊山在縣東南二十三里多婆婆娑摩竹圍三四尺至堅
里人以為弓形如弩

九子嶺在縣西四里

泉山在縣西三十二里其上多漆樹

龜泉在縣西青山有神龜帶銅鑲上此水有穢此水則

便澍雨

石陂水在縣東北百五十里溉田缺餘頃

牛潭在縣東北二十里

洊水縣

中東北至州七百五十里

本漢封陽縣地在今賀州界蕭齊于此置洊安縣屬廣

州至德二年改為洊水縣

齊樂水經縣北百步

滑水在縣北五十里

東莞縣

中西北至州三百里

本漢博羅縣地晉成帝咸和六年于此置寶安縣屬東莞郡隋開皇十年廢郡以縣屬廣州至德二年改為東莞縣取舊郡名也

寶山在縣東北五十里

南海在縣西二里

新會縣 中東北至州三百里

本漢四會縣地隋開皇十年置新會縣屬岡州 岡州即義寧今

廣州理 開元二十三年割屬廣州 系岡州舊唐書云貞觀五年州廢以新會

義寧屬廣州乾元元年復為岡州
與此新會義寧兩縣志文有異

利山在縣南百七十里上多沈香木

南海在縣北一百五十里

義寧縣 下東北至州五百里

本漢番禺縣之地宋元嘉六年于此置義寧縣屬新會
邵隋改屬岡州天寶初廢岡州以縣屬廣州

天路山在縣西一十六里

清遠縣 中南至州二百四十里

本漢中宿縣地也梁武帝于此置清遠郡中宿縣屬之
隋開皇十六年廢郡置清遠縣屬廣州

觀亭山一名觀峽一名中宿峽在縣東三十五里縣昔
取此峽為名

四會縣

中東南至州二百四十里

本秦舊縣也屬桂林郡隋開皇十年改屬廣州

金山一名金岡山在縣北六十五里出金沙

雞籠山在縣西二里

涇陽縣

中南至州四百二十五里

本漢舊縣也屬桂陽郡在涇水之陽因名吳屬始興郡
隋開皇十年改名貞陽屬循州十九年改屬廣州武德
元年復改為涇陽

涇山在縣北四十里涇水所出尉佗為城于此山上名
曰萬人城

涇陽峽一名臯石山在縣南二十五里崖壁千仞猿狖
所不能遊

溱水一名始興大江北自韶州曲江縣界流入東去縣
百一十步

漚浦故關在縣西南四十五里山谷深阻實禁防之要
地也

漚漚縣 中東南至州五百里

本漢舊縣也 地理志含
字無水 屬桂陽郡隋開皇十年于此置

漚州縣屬焉二十年廢漚州以縣屬廣州因縣界漚水
為名也

堯山在縣北四十里

白鹿山在縣東南三十里

淮水西自連州陽山縣界流入經縣南百步

含淮故城本漢含淮縣也在今縣東四里

故淮城在縣西二十步

循州 海豐上

開元戶九千五百二十五
元和戶二千八百九

案鄉數傳寫缺
鄉一十五

木秦南海郡地漢平南越復置南海郡今州即漢南海

郡之博羅縣也梁置梁化郡隋開皇十年于此置循州

取循江為名也大業三年改為龍川郡武德五年復改

為循州

案此所叙未全舊唐書地理志云隋龍川郡武德五年改為循州天寶元年改為海豐郡乾元

元年復為循州

州境

東九百八十三里
西北七十二里

八到

西北至上都取廣柳路四千六百一十里
西北至東都取廣柳路四千四百五十里

東北至韶州一千二百里
南至海一百一十里

西至廣州水路沿泝相兼四百里陸路三百五十里

北至慶州一千五百里

貢賦

開元貢
元和貢

甲香
藤箱

藤器
水馬

蚰蛇膽
大魚睛

鮫魚皮
羅浮柑子

管縣六

歸善

博羅

興寧

海豐

河源

雷鄉

歸善縣

中下郭下

本漢博羅縣地也宋于此置歸善縣屬鄣郡梁屬梁化郡隋開皇十年廢梁化郡以縣屬循州

長山在縣東南百里

寅山在縣東北十五里多出茯苓

南海在縣南一百一十里

河源水北去縣四十步

歸善故城在縣東北七十里

梁化故郡在縣東南八十里

博羅縣

中下東南至州三十里

本漢舊縣也屬南海郡隋開皇十年改屬循州二漢縣
立名不一自吳以後復為博羅

羅浮山在縣西北二十八里羅山之西有浮山蓋蓬萊之一阜浮海而至與羅山並體故曰羅浮高三百六十大周迴三百二十七里峻天之峰四百三十有二焉事具袁彥伯記

浮水出羅浮山

河源水東自歸善縣界流入南去縣一百步

興寧縣

中下西南至州七百里

本漢龍川縣之地也晉于今縣西三里置興寧縣屬東

莞郡隋開皇十年廢郡以縣屬循州

六石山在縣西南二里

循江西自河源縣界流入西去縣五十里

興寧江南去縣一百八十里

海豐縣

中下西北至州五百里

本漢龍川縣地東晉于此置海豐縣屬東莞郡隋開皇

十年廢郡以縣屬循州

南海在縣南二十五里

龍山在縣北五十里

河源縣

中下西南至州二百三十里

本漢龍川縣之地齊于此置河源縣以縣東北三百里有三河之源故名也屬南海郡隋開皇十年改屬循州龍穴山今名龍川山在縣東北三百四十里

循江經縣東南去縣二百步

龍川故城在縣東北水路百七十五里秦龍川縣也秦南海尉任囂疾召龍川令趙佗授之以政即此處也

雷鄉縣

中下西南至州六百里

天授二年廣東都督陳崇業奏置南臨大江

潮州

潮陽下

開元戶九千三百二十九
元和戶一千九百五十五

鄉一十六
鄉一十六

今州即漢南海郡之揭陽縣也晉安帝義熙九年于此

立義安郡及海陽縣隋開皇十年罷郡省海陽縣仍于

郡廨置義安縣以屬循州十一年于義安縣立潮州以

潮流往復因以為名大業三年罷州為義安郡武德四

年復為潮州

州境

東西五百三十六里
南北四百八十四里

八到

西北至上都取度州路五千六百二十里
西北至東都取度州路四千八百一十里

東至大海一百二十里
東北至漳州取漳浦縣路四百八十里

南至大海八十五里
西南至循州一千五百里

西南至廣州水陸路相兼約一千六百里
西北至虔州一千五百里

貢賦

開元貢 甲香 蚶 蛇膽 鮫魚皮 靈龜散
元和貢 細蕉布 水馬

管縣三

海陽 潮陽 程鄉

海陽縣

中下郭下

本漢揭陽縣地晉于此立海陽縣屬義安郡隋開皇十年省郡廢海陽入循州十一年置潮州又立海陽縣以屬焉南濱大海故曰海陽

鳳凰山在縣北一百四十里

大海在縣東南一百一十三步

西津驛在縣西六里

鹽亭驛近海百姓煮海水為鹽遠近取給

官鄣湖在縣東南二十里出名龜以卜勝于舍滙龜

潮陽縣

中下東北至州二百里

本漢揭陽縣地晉安帝分東莞郡置義安郡仍立潮陽縣屬焉以在大海之北故曰潮陽貞元九年移于今理
穫子山一名龍首山在縣東南五十里

龍溪山今名海寧嶺在縣西南一百七十里

大海在縣西南一百三十里

程鄉縣 中下東南至州四百里

本漢揭陽縣地齊于此置程鄉縣蓋分海陽縣立焉屬
義安郡隋開皇十年省十一年置潮州復立程鄉縣屬
焉

西陽山在縣東南四十五里

西陽水在縣南二十三里

端州 高要下

開元戶八千一百四十二 鄉十四
元和戶一千七百九十五 鄉十四

本秦南海郡地漢武帝置蒼梧郡則為蒼梧郡之高要縣也梁大同中于此立高要郡隋開皇十一年置端州大業三年罷為信安郡武德四年平蕭銑五年重置端州州當西江入廣州之要口也

州境

東西一百五十八里
南北一百一十里

八到

西北至上都取韶郴州路四千三百三十五里
西北至東都四千六十五里

東至廣州二百八十四里
東至廣州義寧縣一百五十里

東南至廣州新會縣水路三百里
東北至廣州四會縣陸路一百八十里

西至康州二百九十里
西南水陸相兼至新州一百八十里

北取廣州四會縣界水路至韶州六百四十里

貢賦

開元貢
元和貢

銀四錠
乳香

蕉布
黃魚

麻布
春子

管縣二

高要 平興

高要縣

下郭下

本漢舊縣也屬蒼梧郡有鹽官隋開皇十一年置端州

割屬焉

石室山在縣北五里

零羊峽在縣東水行三十里吳步騭為交州刺史興軍

取南海衡殺錢博等

乘衡殺錢博蒼梧人步騭本傳不載詳見水經注所引王氏交廣春

秋領兵逆之戰于峽口殺博等軍敗投水死者千餘人
即此處也

青岐鎮在縣東八十五里

鵠奔亭在縣西八里漢交趾刺史何敞辨死女子冤即
此處也

平興縣

下西北至州八十里

本漢高要地也晉末分置平興縣屬新寧郡隋開皇十二年罷郡屬端州

漏山在縣東四十里

康州

晉康下

開元戶一萬三千一百五十二 鄉十六
案元和戶鄉數傳寫缺

漢武帝平南越置蒼梧郡今州即蒼梧郡之端溪縣也
晉末于此置晉康郡隋開皇十二年省晉康郡以所領

縣屬端州大業三年罷州為信安郡隋末陷賊武德四年討平蕭銑五年置康州

州境

東西二百七十九里
東北二百四十五里

八到

西北至上都四千五百二十五里
西北至東都四千二百五十五里

東至端州二百九十里
西南水路至瀧州一百八十里

西北沂流至封州一百二十五里
北至霍山一百二十里與廣州蒙化縣分界

貢賦

開元貢 銀 蕉布 麻布

管縣四

端溪 悅城 都城 晉康

端溪縣

本漢端溪舊縣也屬蒼梧郡

端山在縣北百二十五里有樹冬榮其子號曰猪肉子
大于盃炙而食之味如猪肉故名也

西江水經縣南去縣五十二步

悅城縣

下西至州八十里

本漢端溪縣地也宋于此置樂城縣屬端州武德五年

改屬康州天寶元年改名悅城

鬱水一名西江水經縣南去縣十步

程溪水東去縣百步

都城縣

下東北至州四十五里

本漢端溪縣地宋于此分置都城縣屬晉康郡隋大業二年屬封州武德五年改屬康州

鬱水經縣西去縣一里

晉康縣

下東至州七十一里

本漢端溪縣地宋于此置遂安縣貞觀八年于縣置樂州十八年廢州以縣屬康州至德元年改為晉康縣

建水在縣東五十步

封州 臨封下

開元戶五千六百五十二
元和戶八百一十一

鄉七
鄉七

秦為南海郡之地漢平南越置蒼梧郡今州即漢蒼梧郡之廣信縣地也梁于此置梁信郡屬成州隋開皇十年改為封州大業三年罷州以縣屬蒼梧郡武德四年

復置封州

州境

東西一百二十八里
南北二百八十九里

八到

西北至上都取梧州路四千三百八十五里
西北至東都四千一百二十五里

東南泝流至康州一百二十里
西北泝流至梧州五十五里
北至賀州陸路三百九十里水路六百四十里

貢賦

開元貢 銀 蕉布 麻布

管縣二

封川 開建

封川縣 下郭下

本漢廣信縣也梁于此置梁信郡隋開皇十年改為梁信縣屬封州十八年改為封川縣皇朝因之

古關山在縣西十三里

封溪水經縣北去縣十五里

開建縣 下南至州一百七十里

本漢封陽縣之地宋明帝分置開建縣屬臨賀郡

案宋明帝

一作宋文帝隋開皇十年改屬連州武德四年改屬封州

鼠石在縣東北二十四里傍有三穴皆容人居止其石上時多石斛石高五十丈周迴五里

臨賀水一名封溪水經縣西去縣十五里

韶州 始興下

開元戶二萬七百六十四 鄉四十一
元和戶九千六百六十六 鄉四十一

秦南海郡地漢分置桂陽郡今州即桂陽郡之曲江縣也後漢置始興都尉今州即都尉所部吳甘露元年初立為始興郡梁承聖中蕭勃據嶺南于此置東衡州隋

開皇元年平陳改東衡州為韶州取州東北韶石為名十
一年廢入廣州十二年自今南海縣移廣州理曲江之
廢韶州城即今州理是也仁壽元年改廣州為番州大
業二年又自今始興故鎮移番州理南海縣今廣州理
是也三年以番州為南海郡隋末陷賊武德四年平蕭
銑重于此置番州貞元年改為韶州復舊名也

州境

東西六百二十里
南北四百五十里

八到

西北至上都取郴州路三千六百八十五里取虔
州吉州路四千六百八十里

西北至東都取柳州路三千四百二十五里取虔州吉州路二千八百七十里

東北至虔州陸路五百五十里南至廣州水陸相兼五百三十里

西至連州山路險峻五百里西北至柳州陸路四百一十里

貢賦

開元貢

竹布十五尺
蘭桂 石斛

鍾乳五兩
麻布 乳花

管縣六

曲江 始興 樂昌 翁源 浚昌 仁化

曲江縣 上郭下

本漢舊縣也屬桂陽郡江流迴曲因以為名吳置始興

邵縣屬焉隋置韶州縣屬不改皇朝因之

靈鷲山在縣北六里

玉山在縣東南十里有採玉處

銀山在縣西二十二里出銀

韶石在縣東北八十里兩石相對相去一里石高七十丈周迴五里有似雙闕名韶石

牢石在縣東六十里石高七十丈周迴二十一里色備

五彩狀若樓觀上多零羊

葉水經注韶石南有逃石高三十丈廣圓五百丈本在桂

林武城縣夜迅雷忽然遷此彼人來見曰石乃逃來因名逃石以其有靈遷徙又名靈石舊唐書云貞觀十一年改智州為牢州以牢石為名牢石高四十大周二十里或疑牢石即逃石而與是志之高七十丈皆異

王城一名故郡城在縣南六里地勢險固晉義熙初盧循克廣州循將徐道覆移始興郡據此城

湏水在縣東一里元鼎五年征南越樓船將軍下橫浦入湏水即此水

始興縣

下西南至州一百九十四里

本漢南越之地吳于此分置始興郡隋改屬韶州皇朝

因之

大庾嶺一名東嶠山即漢塞上也在縣東北一百七十二里從此至水道所極越之北疆也越相呂嘉破漢將軍韓千秋于石門封送漢節置于塞上即此嶺本名塞上漢伐南越有監軍姓庾城于此地衆軍皆受庾節度故名大庾嶺之戍中此最在東故曰東嶠高一百三十丈秦南有五嶺之戍謂大庾始安臨賀桂陽揭陽縣也

邪階水今名階水出縣東百三十里近水有邪階山又有脩仁水出縣東北東嶠山仍有三楓亭五渡水齊范彥龍為始興守至修仁酌水賦詩曰三楓何習習五渡且悠悠寧飲脩仁水不涸邪階流

安遠鎮在縣東北一百五十里

樂昌縣

中東南至州一百四十里

本漢曲江縣地也梁武帝分曲江置梁化縣屬始興郡隋開皇十年改屬廣州十八年改為樂昌縣武德中改

屬韶州

藍豪山在縣西北一百九十里廣五百里崖嶺峻阻所謂瀧中即此也

滄湖在縣東南十里周迴三十五里南通瀧水

任囂故城在縣南五里秦楚之際南海都尉任囂因中國方亂欲據嶺南故築此城以圖進取囂死此城尉佗因之遂有南越

翁源縣

下西北至州二百八十里

本漢涇陽縣地在今廣州界梁承聖末蕭勃分涇陽立
翁源縣因縣界翁水之源為名也後因不改貞元元年
刺史徐申移于今理

翁水出縣東北一百四十里

松派水與涇水合經縣南二十步

涇昌縣


下西南至州陸路二百三十里

光宅元年析始興北界置涇昌縣北當驛路南臨涇水
大庾嶺在縣北五十六里

仁化縣

下南至州陸路一百一十里

垂拱四年分曲江縣置仁化縣



元和郡縣志卷三十五